

ВОСКРЕСНА СЛУЖБА 4 ГЛАСА

В СУББОТУ НА ВЕЛИЦЕЙ ВЕЧЕРНИ.

На Господи, воззвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен гласа.

Стихиры воскресны, глас 4:

Стих: Изведи из темницы душу мою, * исповедатися Имене Твоему.

Животворящему Твоему Кресту, / непрестанно кланяющеся, Христе Боже, / тридневное Воскресение Твое славим: / тем бо обновил еси истлевшее человеческое естество, Всесильне, / и иже на Небеса восход обновил еси нам, / яко Един Благ и Человеколюбец.

Стих: Мене ждут праведницы, * дондеже воздаси мне.

Древа преслушания запрещение разрешил еси, Спасе, / на древе крестнем волею пригвоздився, / и во ад сошед, Сильне, / смертныя узы, яко Бог, растерзал еси: / темже кланяемса еже из мертвых Твоему Воскресению, / радостию вопиюще: / Всесильне Господи, слава Тебе.

Стих: Из глубины воззвах к Тебе, Господи, * Господи, услыши глас мой.

Врата адова сокрушил еси, Господи, / и Твоею смертию смертное царство разрушил еси: / род же человеческий от истления свободил еси, / живот и нетление миру даровав, / и велию милость.

Ины стихиры, Анатолиевы, глас 4:

Стих: Да будут уши Твои внимлюще * гласу моления моего.

Приидите, воспоим людие, / Спасово тридневное востание, / имже избавихомся адовых нерешимых уз; / и нетление и жизнь вси восприяхом, зовуще: / Распныйся и Погребыйся и Воскресый, / спаси ны Воскресением Твоим, / Едине Человеколюбче.

Стих: Аще беззакония назириши, Господи, Господи, кто постоит; * яко у Тебе очищение есть.

Ангели и человецы, Спасе, / твое поют тридневное Востание, / имже озаришася вселенныя концы, / и работы вражия вси избавихомся, зовуще: / Животворче Всесильне Спасе, / спаси ны Воскресением твоим, / Едине Человеколюбче.

Стих: Имене ради Твоего потерпех Тя, Господи, потерпе душа моя в слово Твое, * упова душа моя на Господа.

Врата медная стерл еси, / и верей сокрушил еси, Христе Боже, / и род человеческий падший воскресил еси. / Сего ради согласно вопием: / Воскресый из мертвых, / Господи, слава Тебе.

Стих: От стражи утренняя до ночи, от стражи утренняя, * да уповае Израиль на Господа.

Господи, еже от Отца Твое Рождество, / безлетно есть и присносущно: / еже от Девы воплощение, / неизреченно человеком и несказанно: / и еже во ад сошествие, страшно диаволу и аггелом его: / смерть бо поправ, тридневен воскресл еси, / нетление подавая человеком, и велию милость.

Таже минеи стихире святому.

Слава святому, аще имать.

Аще ли ни, Слава, и ныне, Богородичен.

Иже Тебе ради богоотец пророк Давид / песненно о Тебе провозгласи, / величия тебе Сотворшему: / предста Царица одесную Тебе. / Тя бо Матерь, Ходатаицу живота показа, / без отца из Тебе вочеловечитися Благоволивый Бог: / да Свой паки обновит образ, истлевший страстьми, / и заблуждшее горохищное обрет овча, / на рамо восприим, к Отцу принесет, / и Своему хотению, с Небесными соединит Силами, / и спасет, Богородице, мир, / Христос имеяй велию и богатую милость.

Таже: Свете Тихий: Прокимен и прочая.

На стиховне стихире воскресны, глас 4.

Господи, восшед на Крест, / прадедную нашу клятву потребил еси, / и сошед во ад, вечныя юзники свободил еси, / нетление даруя человеческому роду, / сего ради поюще славим / Животворящее и Спасительное твое Востание.

Стих: Господь воцарися, * в лепоту облечеса.

Повешен на древе, Едине Сильне, / всю тварь поколебал еси: / положен же во гробе, / живущия во гробех воскресил еси, / нетление и жизнь даруя человеческому роду. / Темже поюще славим / тридневное Твое Востание.

Стих: Ибо утверди вселенную, * яже не подвижится.

Людие беззаконнии, Христе, / Тебе предавше Пилату, / распяти осудиша, неблагодарнии о Благодетеле явившесе. / Но волею претерпел еси погребение: / самовластно воскресл еси тридневен, яко Бог, / даруя нам безконечный живот, / и велию милость.

Стих: Дому Твоему подобает святыня, * Господи, в долготу дней.

Со слезами жены дошедша гроба, / Тебе искаху, не обретша же, рыдающа с плачем вопиюща глаголаху: / увы нам, Спасе наш Царю всех, / како украден был еси? / кое же место держит Живоносное Тело Твое? / Ангел же к ним отвещаваше: / не плачите, глаголет, но шедша проповедите, / яко воскресе Господь, / подая нам радость, яко Един Благоутробен.

Слава, минеи, аще есть. Аще ли ни, Слава, и ныне, Богородичен:

Призри на моления Твоих раб, Всенепорочная, / утоляющи лютая на ны востания, / всякия скорби нас изменяющи. Тя бо Едину, / твердое и известное Утверждение имамы, / и Твое предстательство стяжахом, / да не постыдимся, Владычице, / Тя призывающи, потщися на умоление Тебе верно вопиющих: / радуйся, Владычице, / всех Помоще, Радосте и Покрове, / и Спасение душ наших.

Таже, Ныне отпускаеши: **Трисвятое. И по Отче** наш:

Тропарь воскресен, глас 4:

Светлую Воскресения проповедь / от Ангела уведевше Господи ученицы, / и прадеднее осуждение отвергши, / апостолом хвалящаяся, глаголаху: / исповержесе смерть, / воскресе Христос Бог, / даруяй миру велию милость.

Богородичен:

Еже от века утаенное, / и ангелом несведомое таинство: / Тобою Богородице сущым на земли явися Бог, / в неслитном соединении воплощаемь, / и крест волею нас ради восприим, / имже воскресив первозданнаго, / спасе от смерти души наша.

НА ПОВЕЧЕРИИ

Канон Пресвятей Богородице, глас 4

Песнь 1

Ирмос: Моря чермную пучину / невлажными стопами / древний пешествовав Израиль, / крестообразныма Моисеовыма рукама, / амаликову силу в пустыни победил есть.

Припев: Пресвятая Богородице спаси нас.

Яже Едина в напастех и скорбех защищающая, под кров Твой Пречистая, прибегающих тепле, прими яко Преблагая, яже от сердца моления.

Пристанище невлаемое обрет Тя неразумный, напастныя же и нуждныя прилоги отревая, благодарное пою Ти воспевание, Богомужная Родительнице.

Слава: Милостивным и кротким Твоим оком, Богородительнице, зрящи мя во обстоянии и скорби одержима, вскоре свободи: Тя бо призываю на помощь.

И ныне: Преклонена мя Владычице, скорбьми нуждными люте, яко Милостива Едина Благая Предстательница рабов Твоих, руку мольбы простри, и лютых бед избави мя.

Песнь 3

Ирмос: Лук сильных изнеможе, / и немощствующии препоясашася силою: / сего ради утвердися в Господе сердце мое.

Оружие крепко, и стену Тя стяжав аз, побеждаю сопротивных полки, и пою величия Твоя, Богородице Неискусобрачная.

Пещь разоряеши печалей, и погашаеши отчаяния зной: кто бо тако, якоже Ты Дево Богородице, упование наше.

Слава: Внуши глас раба Твоего, Твоя требующаго помощи, Богомати: упование мое, услыши мя, и напастей исхити.

И ныне: Прииде от прегрешений множества мучительство нам, нося смерть пагубную: но спаси Твоя рабы Богородице, Ты бо можеш.

Песнь 4

Ирмос: Вознесена Тя видевши церковь на Кресте, / солнце праведное, / ста в чине своем, / достойно зывающи: / слава силе Твоей Господи.

Побеждши враждующих мне всуе, яко душу мою тщасихся люте прияти, сохрани мя Владычице, помилуй, и спаси: к Тебе бо прибегаю раб Твой.

Избавляючи мя от языка льстивоглаголива, Благая Заступнице моя, безпакостна покажи, и житейских деяний: много бо можеш, яко Зиждителя Мати сущи.

Слава: Безболезненну ведый Тя Целебницу немощный, духом и усты зову: исцели мя Владычице, помилуй, и спаси: к Тебе бо прибегаю раб Твой.

И ныне: Не остави мене напастем предану быти, Мати Бога нашего, но от всякия скорби и злобы человекчи сохрани невреждена: Ты бо еси Помощница всем нам.

Песнь 5

Ирмос: Ты Господи мой, Свет в мир пришел еси, / Свет Святый, / обращаай из мрачна неведения, / верою воспевающя Тя.

Исправи Чистая, молитву раба Твоего ко Господу Сыну Твоему: да обрящу разрешение многих моих прегрешений.

Избави мя страстей и бед, Богоневесто: Тя бо положи Бог очищение воистинну моему смирению.

Слава: Покров мой Ты еси, и присное хваление, О Владычице Богородице! Никакоже бо презираеши к Тебе прибегающих.

И ныне: Помилуй Чистая, чтущих Рождество Твое, и избави мучительства, и горести человеческия: ибо имаши еже мощи.

Песнь 6

Ирмос: Пожру Ти со гласом хваления Господи, / Церковь вопиет Ти, / от бесовския крове очищися, / ради милости от ребр Твоих истекшею Кровию.

Крепость ми Сама еси Пречистая Владычице, во обретших мя зело неначаянных скорбех, и вопию Ти: яко Велия еси Покровительница рабу Твоему.

Исцели душевныя моя язвы Пречистая, заступи мя Дево, и избави раба Твоего от оклеветания, навета же и развращения неправедна.

Слава: Сокруши на мя, присно прибегающаго к Тебе, наветники неправедныя, и не остави мя погибнути: яко вся Тебе возможна Чистая, яко Богоотроковице.

И ныне: Победи души моя свирепую волну, яко множество прегрешений, напастей и скорбей, Владычице, восташа на мя, но Сама мя спаси.

Господи помилуй, трижды.

Слава, и ныне:

Седален, глас 4:

Многими прегрешении аз блудный ум помрачив, / вопию Твоему крепкому заступлению Богородице: / просвети души моя зеницы, / возсияй ми покаяния светлую зарю, / и облецы мя во оружие света, / Богородительнице Чистая.

Песнь 7

Ирмос: Спасый во огни авраамския Твоя отроки, / и халдеи убив, яже правда праведно уловляше, / Препетый Господи Боже отец наших, благословен еси.

Иже от агарян насилование скоро потребльши мечем молитв Твоих Марие, люди и стадо Твое сохрани, Сыну Твоему зовущия: Боже отец наших, благословен еси.

Равнолепная Скиния, прими мя к Тебе прибегающего, да не примет мя враг погубити хотя, зовущаго: Превозносимый отец наших Боже, благословен еси.

Слава: Богородительнице Марие, предвари раба Твоего вскоре, в треволнениях напастей потопляемаго, не имущаго помощи, к Тебе же зовуща: упование концев, помилуй мя.

И ныне: Человеческия помыслы яко грехом виновны, ныне Богородице Благая разори, Божественными Твоими молитвами, и рабы Твоя избави болезненные напасти и всякаго вреда.

Песнь 8

Ирмос: Избавителю всех Всесильне, / посреде пламене благочествовавшая, / снизшед оросил еси, / и научил еси пети: / вся дела благословите, пойте Господа.

Найде на ны язык беззаконен, хваляся погубити служители Твоя: егоже потребльши Пречистая, покрый взывающия: вся дела благословите Господня Господа.

Многия Твоя щедроты милостивно нас спасают, Едина Богомати, от греховнаго суда, и различных напастей: Ты бо рождши Бога, милуеши мир Его.

Слава: Яко Ты еси крепость и помощь, не боюся врагов негодования, но пою Тя Владычице, и вопию Сыну Твоему: благословите вся дела Господня Господа.

И ныне: На мольбу мою ныне умилосердися, и радость в печали место даруй ми: да пою Тя Владычице, и вопию Сыну Твоему: благословите вся дела Господня Господа.

Песнь 9

Ирмос: Ева убо недугом преслушания клятву вселила есть: / Ты же Дево Богородице, / прозябением чревоношения мірови / благословение процвела еси, / тем Тя вси величаем.

Оружие убо на ны обострив, совещаает льстивый аравлянин беззаконный: Ты же Дево Богородице, силою Креста и молитв Твоих, вооружаеши на него рабы Твоя. Темже проповедаем славу Твою.

Крепость Тебе на враги дадесе Владычице, и избавление ми от бед: что же аз Тебе принесу, не довел. Обаче, еже имам, благодарение приношу Ти: прими сие ныне, и спаси мя.

Слава: **О** Мати всяческих Творца Всесветлая, печальных утеха, потопляемых Предстательница, и пренемогающихся Заступница, до живота моего Ты мя сохрани.

И ныне: **У**тесняема мя грехи многими, и бедами, не презри мене Всепетая ныне, Тебе хваления жертву приношу, прилежно взывая Ти: Святая Богородице, помози ми, Тя бо славя песнь скончаваю.

Таже: Достойно есть: **Трисвятое. Кондак воскресен, и отпуст.**

НА ПОЛУНОЩНИЦЕ

Канон ко Святей и Живоначальной Троице, егоже краестрочие:
Четвертое пение Богу. Глас 4.

Творение Митрофаново

Песнь 1

Ирмос: Моря чермную пучину / невлажными стопами / древний пешествовав Израиль, / крестообразными Моисеевыми руками, / амаликову силу в пустыни победил есть.

Припев: Пресвятая Троице Боже наш, слава Тебе.

Троицу Богоначальную да прославим Ипостасьми, Единственное же Естество Триех, Соприсносущную, Сопрестольную, Юже моляще, глаголем: спаси иже верою Тебе славящих.

Помазася от Отца Духом радования, Богодетельным елеем, Сын, и Человек бысть, и Единого Божества Триипостасное научил есть.

Слава: Доброту неприступная славы Твоя Единице Трисолнечная, серафими не терпяще зрети, спокрываются крылы: и Трисвятыми песнями непрестанно Тебе славят.

Богородичен: Неизреченно Творца родила еси всех Пречистая, избавляющаго древняя клятвы человеки, и смертныя тли, и Тобою познахом Единого Бога Триипостаснаго.

Песнь 3

Ирмос: Не мудростию и силою / и богатством хвалимся, / но Тобою Отчею Ипостасною / мудростию Христе: / несть бо свят, паче Тебе Человеколюбче.

Силу свыше святым Твоим прежде апостолом, яко послал еси Христе, от Отца Утешителя, Едино явил еси Естество Трисолнечное.

Патриарху Аврааму егда явилася еси во образе мужесте, Троицня Единице, непременно показала еси Твоя Благости и Господства.

Слава: Иже во Образех Триех, Един Бог веруемый: Неописанный яве, Недомыслимый всеми, избави души наша от всякия скорби.

Богородичен: Наставльшеся Сына Твоего премудрыми приведеньми, Единственное и Трисветлое Богоначалие славим, и Тебе блажим Приснодеву.

Седален, глас 4.

Подобен: Скоро предвари:

Трисолнечная, Несозданная и Единосущная Единице, / Триипостасная и Непостижимая, / рабы Твоя ущедр: / спаси от бед, яко Бог милостив, / Тя бо Господи, Единого Избавителя / и Владыку имамы, вопиюще: / буди нам милостив.

Слава, и ныне, Богородичен:

Многими обстояньми и напастьми лютых Дево, / окружаеми, и ко отчаянию присно впадающе, / Едину Тя спасение и надежду, / и стену имамы Богородице, / и Тебе по долгу верою / и ныне молим: / спаси рабы Твоя.

Песнь 4

Ирмос: Седяй в славе / на Престоле Божества, / во облаце легце прииде Иисус Пребожественный, / нетленною дланию, и спасе зовущыя: / слава Христе силе Твоей.

Пресущную Троицу, во Единице Божества и Господоначалие, с серафимы Тебе славим, яко Нераздельно Естество, яко Непреступное, яко равностатно славою, Боже Непостижимый.

Разделенну сущу неизреченно Лицы Божества, и соединяему Державою вкупе Едином Господьством, Безпредельну Едину, Неописанну, воспеваем Тя Творца всея твари.

Слава: Ум Безначальный, Слово Неизглаголанне роди, и Божественного Духа Равномощна испусти: и сего ради Троицу Единосущную, Владыку всех Бога проповедаем.

Богородичен: Видимь бывая древними образне, предвозвестило есть, еже от Тебе воплощение, Слово: но послежде явлься человеком, поистинне Триипостасное Единоначалие яви.

Песнь 5

Ирмос: Ужасошася всяческая о Божественней славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя мир подавающая.

Разумевше от веры Вседетельнаго Божества, Едино убо Непреступно Существо, Три же Ипостаси Живоначальны, сраслены чем: Отца, и Сына, и Духа Святаго Соприсносущное бытие.

Свете Трисолнечне, существеннаго Света Твоего возсияй ми Единственное Божество, Несозданное Естество, и светодейственный Источниче всякия светодательныя зари: да созерцаю Твою доброту неизреченную.

Слава: Яко Единому существу Содетелю всяческих, и Содержителю, и Кормчию Всепремудру, воистинну и жизни Подателю, сего ради и вопием Ти верно: Владыко Трисолнечне, поющыя Тя соблюди.

Богородичен: Обожити хотя древле истлевшаго человека, за благость Дево создавый, и показавый Образа Божественный зрак, Человек бысть из Тебе, Едино Трчисленное Богоначалие проповеда.

Песнь 6

Ирмос: Возопи, прообразуя погребение тридневное, / пророк Иона в ките моляся: / от тли избави мя, Иисусе Царю Сил.

Яви Отец изглаголюя Сыновство, и Дух, Христу крещшуся, видимь быв: сего ради Едино и Троическое Богоначалие славим.

Яко виде Тя Трисвятыми гласы воспеваемого Исаиа, на высоте Престоле сидяща, Троическую позна Единого Богоначалия Ипостась.

Слава: Возвышено сердце покажи и нас раб Твоих, Высокий Царю Триипостасне: да Твоя славы зрим ясно светлость.

Богородичен: Восхоте вообразитися яве в наше, от Девы Сын Божий яко Человеколюбец, и Божественныя Славы общники человеки сотвори.

Седален, глас 4.

Подобен: Скоро предвари:

Отца нерожденна, Сына же рожденна, и Духа Святаго исходна от Отца мудрствующе, проповедаем Безначальное Царство и Божество Едино, Еже славословяще единомудренно вопием: Троице Единосущная, спаси нас Боже.

Слава, и ныне, Богородичен:

Лет превышше, и прежде век Бога, в лето родила еси преестественне плотию, Бога Человека Пречистая. Темже Тя Богородицу, истинно и господьственне вси исповедающе, прилежно Ти вопием: славы вечныя вся сподоби.

Песнь 7

Ирмос: В пещи Авраамстии отроцы персидстей, / любовьию благочестия паче, / нежели пламенем опаляеми, зываху: / благословен еси в храме Славы Твоея Господи.

Учиненая небесная естества, и умныя чины православно вси земнороднии подражающе, славим Едино Божество в Трех Равнодетельных Ипостасех. **[Дважды]**

Слава: Речи святых пророк, Тя древле образно Единаго веков всех Содетеля проявиша, Неизреченнаго Бога и Господа, Богоначальными Тремя Ипостасьми.

Богородичен: Иже по существу Невидимое Слово и Вседетельное, явился еси человеком, Человек от Чистыя Богоматере, человека призывая ко причастию Твоего Божества.

Песнь 8

Ирмос: Руце распростер Даниил, / львов зияния в рове затче: / огненную же силу угасиша, / добродетелию препоясавшися, / благочестия рачители отроцы, зывающе: / благословите вся дела Господня Господа.

Свете Единоначальный и Трисиянный, Существо Безначальное, Доброто Недоведомая, в сердца моем вселися, и храм Твоего Божества, световиден и чист покажи мя, зовуща: благословите вся дела Господня Господа, пойте и превозносите Его во веки.

Слава: От различных мя страстей Троице Нераздельная, Единице Неслитная, и омрачения прегрешений избави, и озари лучами Твоими Божественными: да вообразую Твою славу, и воспеваю Тя славы Господа.

Богородичен: Ум убо Нерожденный Отец, и Слово Сообразно, и Дух Сопрестолен, Существо, Сила, Бытие: Пресущная, Неизреченная, Великодейственная Троице, Единице, соблюдай стадо Твое молитвами Богородицы, яко Естеством Человеколюбец.

Песнь 9

Ирмос: Всяк земнородный / да възиграется Духом просвещаемь, / да торжествует же безплотных умов естество, / почитающее священное торжество Богоматере, / и да вопиет: / радуйся Всеблаженная Богородице, Чистая Приснодево.

Все к Тебе ныне движу сердце мое и мысль, и предложения же всея души и тела, Содетелю и Избавителю моему, Единоначальне, и Трисветле, и вопию Ти: спаси мя раба Твоего от всяких искушений и скорбей. **[Дважды]**

Слава: Возвыси наш ум, и мысль к Тебе Вышнему, просвети Твоими сияньми Пречистыми, Отче, Слове, Утешителю, во Свете живый Неприступнем, Славы Солнце, Светодержче, всегда славити Тя Единоначального Бога Триипостаснаго.

Богородичен: Спаси иже в Тя верующыя Господи, и проповедающыя Безначальное Присносущное Существо Едино, Три же Лица Богоначальна и Сообразна, Твоего Господьствия, и Божественныя Славы Твоя сподоби, мольбами Чистыя Богоматере.

Таже троичны Григория Синаита. Достойно есть: И прочее полунощницы.

НА УТРЕНИ

По шестопсалмии Бог Господь, на глас 4 ый глаголем тропарь воскресный, дважды, и Богородичен единожды, писаны на велицей вечерни. Также обычное стихословие псалтиря.

По 1-м стихословии, седальны воскресны, глас 4:

Возревша на гробный вход, / и пламене ангельскаго не терпяща мироносицы, / с трепетом дивляхуся, глаголюща: / егда украдеса отверзый разбойнику рай; / еда ли воста, Иже и прежде страсти проповедавый востание; / воистинну воскресе Христос, / сущым во аде подая живот, и воскресение.

Стих: Воскресни Господи Боже мой, да вознесется рука Твоя * не забуди убогих Твоих до конца.

Вольным Твоим советом Крест претерпел еси Спасе: / и во гробе нове человецы положиша Тя смертнии, / словом концы составляшаго. / Темже связан бысть чуждий: / смерть люто пленяшеся, и сущии во аде вси взываху / живоносному востанию Твоему: / Христос воскресе, / Жизнодавец пребываяй во веки.

Слава, и ныне, Богородичен:

Удивися Иосиф, / еже паче естества зря, / и внимаше мыслию иже на руно дождь, / в безсеменном зачатии Твоем Богородице, / купину огнем неопалимую, / жезл Ааронов прозябший, / и свидетельствуя обручник Твой и хранитель, / священником взываше: / Дева раждает, / и по рождестве паки Дева пребывает.

По 2-м стихословии седальны воскресны, глас 4:

Подобен: Скоро предвари:

Воскресл еси яко Безсмертный из гроба Спасе, / совоздвигл еси мир Твой силою Твоею / Христе Боже наш, / сокрушил еси в крепости смерти державу, / показал еси Милостиве, воскресение всем: / темже Тя и славим / Едине Человеколюбче.

Стих: Исповемся Тебе Господи всем сердцем моим * повем вся чудеса Твоя.

С горних высот сошед Гавриил, / и к камению приступль, идеже Камень жизни, / белоносый взываше ко плачущым: / престаните вы от рыдания вопля, / имеющие и ныне милостивное: / Егоже бо ищите плачуща, / дерзайте, яко воистинну востал есть. / Темже возопийте апостолом: / яко воскресе Господь, Воставшему / поклонитесь радость приемша. / Дерзайте убо, да дерзает убо и Ева.

Слава, и ныне, Богородичен:

Удивишася Чистая, / вси ангелов лица таинству / Твоего рождения страшному: / како Иже вся содержай манием едином, / объятии Твоими яко человек содержавается, / и приемлет начало Превечный и млеко питается, / Иже всякое дыхание питай неизреченною благодатию; / и Тя яко воистинну Божию Матерь хваляще славят.

Таже, Блажени непорочнии:

Посем тропари: Ангельский собор:

По непорочных ипакои, глас 4:

Яже Твоего преславнаго востания, / предтекшия мироносицы, / апостолом проповедаху Христе, / яко воскресл еси яко Бог, / подая миру велию милость.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящии Сиона, / посрамитесь от Господа, / яко трава бо огнем / будете изсохше.

Слава: / Святым Духом / всяка душа живится, / и чистотою возвышается, / светлеется Троическим Единством священнотайне.

И ныне, тойже.

Антифон 2:

Возвах Тебе Господи тепле, / из глубины души моя, / и мне да будут на послушание / божественная Твоя ушеса.

На Господа надежду / всяк кто стяжав, / вышший есть / всех скорбящих.

Слава: Святым Духом / точатся благодатныя струи, / напаяюща всяку тварь / ко оживлению.

И ныне, тойже.

Антифон 3:

Сердце мое к Тебе Слове / да возвысится, / и да ничтоже усладит мя / от мирских красот на слабость.

К матери своей / якоже имать кто любовь, / ко Господу тепльше / любление должны есмы.

Слава: Святым Духом / боговедения богатство, / зрения, и премудрости: / вся бо в сем отеческая веления слово открывает.

И ныне, тойже.

Прокимен, глас 4:

Прокимен: Воскресни Господи, помози нам, и избави нас Имене Твоего ради.

Стих: Боже ушима нашими услышахом:

Всякое дыхание:

Евангелие воскресно, и прочая по ряду.

Воскресение Христово видевши, / поклонимся Святому Господу Иисусу, / Единому Безгрешному. / Кресту Твоему поклоняемся Христе, / и Святое Воскресение Твое поем и славим: / Ты бо еси Бог наш, / разве Тебе иного не знаем, / Имя Твое именуем. / Приидите вси вернии, / поклонимся Святому Христову воскресению: / се бо прииде Крестом радость всему миру. / Всегда благословяще Господа, / поем Воскресение Его: / распятие бо претерпев, / смертью смерть разруши.

Псалом 50: Помилуй мя Боже:

Слава: / Молитвами апостолов, / Милостиве, очисти / множества согрешений наших.

И ныне: / Молитвами Богородицы, / Милостиве, очисти / множества согрешений наших.

Таже, глас 6: Помилуй мя Боже / по велицей милости Твоей, / и по множеству щедрот Твоих / очисти беззаконие мое.

Посем стихира:

Воскрес Иисус от гроба, / якоже прорече, / даде нам живот вечный, / и велию милость.

Спаси Боже люди Твоя:

И возглас: Милостию и щедротами и человеколюбием:

Каноны: воскресный на 4: крестовоскресный на 3: и Богородичен на 3: Минеи на 4. Аще же празднуется святыи, на 6: крестовоскресный на 2, и Богородицы на 2.

Канон воскресен. Глас 4.

Песнь 1

Ирмос: Моря чермную пучину / невлажными стопами / древний пешествовав Израиль, / крестообразными Моисеевыми руками, / амаликову силу в пустыни победил есть.

Припев: Слава Господи Святому Воскресению Твоему.

Вознеслся еси на пречистом древе крестнем, наше отпадение исправляя, еже на древе исцеляя всегубительство Владыко, яко Благ и Всесилен.

Припев: Слава Господи Святому Воскресению Твоему.

Во гробе плотски, во аде же с душею, яко Бог: в раи же с разбойником, и на Престоле был еси Христе, со Отцем и Духом, вся исполняя Неописанный.

Припев: Пресвятая Богородице спаси нас.

Богородичен: Без семени Отчею волею от Божественнаго Духа Божия зачала еси Сына, и плотию родила еси: Иже из Отца без матере, нас же ради, из Тебе без отца.

Ин канон, крестовоскресный

Глас 4.

Песнь 1

Ирмос: Отверзу уста моя, и наполнятся Духа:

Припев: Слава Господи Кресту Твоему честному и Воскресению.

Исцелил еси сокрушение человечества Господи, Божественною Твоею Кровию обновивый то: и сокрушил еси сильнаго в крепости, иже древле сокрушившаго Твое создание.

Припев: Слава Господи Кресту Твоему честному и Воскресению.

Мертвых востание, умерщвлением был еси: крепость бо отъяты умерщвления, бравшися с Жизнию вечною, Иже всеми владычествующу воплощенному Богу.

Припев: Пресвятая Богородице спаси нас.

Богородичен: Красен превышши небесных сил, Божественный Твой бысть Храм Одушевленный, во утробе Ты носивши Дево, Горо Святая, Бога нашего.

Ин канон Пресвятей Богородице,

егоже краестрочие: Четвертая песнь Всеславней Отроковице.

Глас 4.

Песнь 1

Ирмос: Тростаты крепкия, рождейся от Девы:

Припев: Пресвятая Богородице спаси нас.

Сотрясошася людие, смятошася языцы, царствия же державная уклонишася Чистая, от страха рождества Твоего: прииде бо Царь мой, и низложи мучителя, и мир от тли избави.

Припев: Пресвятая Богородице спаси нас.

Жилище Свое живый в вышних, к человеку сошед, освяти Христе, и непоколебимо яви: Едина бо по рождестве девства сокровище, Зиждителя рождши пребыла еси.

Песнь 3

Ирмос: Веселится о Тебе Церковь Твоя Христе, зовущи: / Ты моя крепость Господи, / и прибежище, и утверждение.

Припев: Слава Господи Святому Воскресению Твоему.

Древо животное, мысленный истинный виноград, на Кресте висит, всем источая нетление.

Припев: Слава Господи Святому Воскресению Твоему.

Яко велик, яко страшен, яко адово низложь шатание, и яко Бог нетленен, ныне плотски воскрес.

Припев: Пресвятая Богородице спаси нас.

Богородичен: Ты едина сущым на земли, яже паче естества благих Ходатаица, Мати Божия была еси: темже Ти, радуйся, приносим.

Ин, Кресту :

Ирмос: Твоя песнословцы Богородице:

Припев: Слава Господи Кресту Твоему честному и Воскресению.

Ядом исполненный мнѣ змий зубы вонзе, Спасе, яже Вседержителю Владыко, гвоздьми рук Твоих сокрушил еси: яко несть свят во святых, паче Тебе Человеколюбче.

Припев: Слава Господи Кресту Твоему честному и Воскресению.

Виден был еси Человеколюбче волею во гробе мертв, Животворче, и врата развергл еси адова, яже от веков душам: яко несть свят во святых разве Тебе Человеколюбче.

Припев: Пресвятая Богородице спаси нас.

Богородичен: Неорана бразда явилася еси, клас животный рождши, всем причащающимся безсмертию Ходатая, во святых Святаго свято почивающаго.

Ин, Богородице :

Ирмос: С высоты снишел еси волею на землю:

Припев: Пресвятая Богородице спаси нас.

Очищается человек существо, Тобою присовокупльшееся нестерпимому Божественному Огню: яко сокровенный, Пречистая Дево, в Тебе Хлеб испекшееся, Иже и Тебе неврежденну сохраншему.

Припев: Пресвятая Богородице спаси нас.

Кая сия яже воистинну близ Бога; яко превозшедши вся ангельския чины, едина добротою девства, яко Мати сияющи Вседержителя.

Песнь 4

Ирмос: Вознесена Тя видевши церковь на Кресте, / солнце праведное, / ста в чине своем, / достойно взывающи: / слава силе Твоей Господи.

Припев: Слава Господи Святому Воскресению Твоему.

Возшел еси, страсти моя исцеляя, на Крест страстию Пречистыя плоти Твоея, в нуже волею облеклся еси. Темже Ти взываем: слава силе Твоей Господи.

Припев: Слава Господи Святому Воскресению Твоему.

Безгрешнаго смерть вкусивши, Животворящаго Тела Твоего, достойно Владыко умертвися: мы же вопием Ти, слава силе Твоей Господи.

Припев: Пресвятая Богородице спаси нас.

Богородичен: Неискусобратно родила еси Дево, и по рождестве явилася еси девствующи паки: темже немолчными гласы, еже радуйся Тебе Владычице, верою несумненною взываем.

Ин, Кресту :

Ирмос: Незследный Божий Совет:

Припев: Слава Господи Кресту Твоему честному и Воскресению.

Взаконен сый Израиль, Тебе Христе взаконившаго Бога не позна: но яко беззаконника, законопреступая, на Кресте пригвозди, иже законоположению недостойный.

Припев: Слава Господи Кресту Твоему честному и Воскресению.

Обожена Твоя Спасе Душа, адова сокровища пленивши, яже от века совоскреси души: живоносное же Тело всем нетление источи.

Припев: Пресвятая Богородице спаси нас.

Богородичен: Тебе Приснодеву и истинную Богородицу вси славим, Юже прообразоваше боговидцу Моисею неопально Пречистая, купина, огню примесившися.

Ин, Богородице :

Ирмос: Седяй в славе:

Припев: Пресвятая Богородице спаси нас.

Поживе с человеки, видимъ быв Невидимый, во зраце сый Непостижимаго Божества, о вообрази из Тебе Отроковице в чуждее, ведущих Тя Чистую Богоматерь спасает.

Припев: Пресвятая Богородице спаси нас.

Прият в вещественне Дева Невещественнаго, в причастии вещества, Младенца от Нея бывша. Темже во дву существу, Един познавается плотоносец Бог, и Человек Пресущественный.

Припев: Пресвятая Богородице спаси нас.

По Рождеству Тя Деву, Иже в Деву Тя вселися, и рождься без семени, Слово и Бог пребысть, и в рождестве Деву сохрани, яко Владыка и Зиждитель всея твари.

Песнь 5

Ирмос: Ты Господи мой, / Свет в мир пришел еси, / Свет Святой, / обращаешь из мрачна неведения, / верою воспевающия Тя.

Припев: Слава Господи Святому Воскресению Твоему.

Ты Господи, к земли милостивно сошел еси: Ты вознесл еси падшее человеческое существо, на древе воздвигаемь.

Припев: Слава Господи Святому Воскресению Твоему.

Ты взял ми еси Христе, прегрешений осуждение: Ты разрушил еси болезни смертныя Щедре, Божественным воскресением Твоим.

Припев: Пресвятая Богородице спаси нас.

Богородичен: Тя оружие непобедимое на враги предлагаем, Тя утверждение, и надежду нашего спасения Богоневесто стяжахом.

Ин, Кресту :

Ирмос: Ужасошася всяческая о Божественней:

Припев: Слава Господи Кресту Твоему честному и Воскресению.

Прият Тя всего усты ад безумный: на Кресте бо пригвождена Тя видево, копием прободена, бездыханна, Живаго Бога, проста вменяше человека. Разуме же искусивый крепость Твоего Божества.

Припев: Слава Господи Кресту Твоему честному и Воскресению.

Разрушенный, Человеколюбче, Храм Твоего Телесе, гроб разделивый и ад неволю оба суда истязуеми суть: ов убо святых Твоих души, телеса же другий соотсылающе, Безсмертне.

Припев: Пресвятая Богородице спаси нас.

Богородичен: Се ныне исполнися пророческое проречение: Ты бо Неискусобрачная Дево, имела еси во утробе над всеми Бога и родила еси Безлетнаго Сына, всем воспевающим Тя, мир подавающа.

Ин, Богородице :

Ирмос: Ныне востану:

Припев: Пресвятая Богородице спаси нас.

Дом Тя славы, Гору Божию Святую Чистая, Невесту, Чертог, Храм освящения, Сын Божий, в Тя вселився, и рай сладости присносущныя нам содела.

Припев: Пресвятая Богородице спаси нас.

Плоть от крове Девственныя приял еси Христе, Безсеменну, Пречисту, Ипостасну, и словесну и умну, одушевленну, действенну, хотетельну, Самовладычну и Самовластну.

Припев: Пресвятая Богородице спаси нас.

Мучителей разум Девственное посрами чрево: Младенец бо язву аспидную душегубную испыта рукою, и отступника гордаго низлож, верных под нозе покори.

Песнь 6

Ирмос: Пожру Ти со гласом хваления Господи, / Церковь вопиет Ти, / от бесовския крове очищися, / ради милости от ребр Твоих истекшею Кровию.

Припев: Слава Господи Святому Воскресению Твоему.

Возшел еси на Крест, силою препоясався, и соплется с мучителем яко Бог, с высоты свергл еси, Адама же непобедимую силою воскресил еси.

Припев: Слава Господи Святому Воскресению Твоему.

Воскресл еси блистаяся красный из гроба Христе, и разгнал еси вся враги Божественною силою Твоею, и вся яко Бог, веселия исполнил еси.

Припев: Пресвятая Богородице спаси нас.

Богородичен: О чудо всех чудес новейшее! Яко Дева во утробе, всяческая обдержажаяго неискусомужно заченши, не тесновмести.

Ин, Кресту :

Ирмос: Приидох во глубины морския:

Припев: Слава Господи Кресту Твоему честному и Воскресению.

Отверзе гортань свой ад, и пожре мя, и душу разшири безумный: но Христос сошед, возведе жизнь мою, яко Человеколюбец.

Припев: Слава Господи Кресту Твоему честному и Воскресению.

Погибе смертию смерть, умерый бо воскресе, нетление мне даруя: явлься же женам провеща радость Безсмертный.

Припев: Пресвятая Богородице спаси нас.

Богородичен: Нестерпимаго Божества вместилище чистое утроба Твоя явился, О Богородице! Еже без страха небеснии чинове воззрети не возмогоша.

Ин, Богородице :

Ирмос: Приидох во глубины морския:

Припев: Пресвятая Богородице спаси нас.

Древле убо прельсти мя змий, и умори мя, праматерию моею Евою: ныне же Чистая, Тобою создавый мя из истления воззва.

Припев: Пресвятая Богородице спаси нас.

Бездна Тя бездну неизреченно благоутробия Отроковице, избранную показа чудес: ибо из Тебе молниєю Божества, бисер Христос возсия.

Кондак, глас 4.

Подобен: Явился еси днесь:

Спас и Избавитель мой, / из гроба яко Бог воскреси / от уз земнородных, / и врата ада сокруши, / и яко Владыка воскресе тридневен.

Икос: Воскресшаго из мертвых, Христа Жизнодавца тридневна из гроба, и врата смертная днесь сокрушшаго силою Своею, и ада умертвившаго, и жало смертное стершаго, и Адама со Евою свободившаго, воспоим вси земнороднии, вопиюще хвалу прилежно: Той бо яко Един Крепкий, Бог и Владыка, воскрес тридневен.

Песнь 7

Ирмос: В пещи Авраамстии отроцы персидстей, / любовьию благочестия паче, / нежели пламенем опаляеми, зываху: / благословен еси в храме Славы Твоя Господи.

Припев: Слава Господи Святому Воскресению Твоему.

К нетлению человечество призвася, Божественною измовено Кровию Христовою, благодарно воспевающее: благословен еси в храме Славы Твоя Господи.

Припев: Слава Господи Святому Воскресению Твоему.

Яко Живоносец, яко рая краснейший воистинну, и чертога всякаго царскаго показася светлейший Христе, гроб Твой, источник нашего воскресения.

Припев: Пресвятая Богородице спаси нас.

Богородичен: Вышняго освященное Божественное селение радуйся, Тобою бо дадеся радость Богородице, зовущим: благословена Ты в женах еси Всенепорочная Владычице.

Ин, Кресту :

Ирмос: Не послужиша твари богомудрии паче Создавшего:

Припев: Слава Господи Кресту Твоему честному и Воскресению.

Смирил еси на древо воздвигаемь, око высокое, и превознесенную бровь на землю низложил еси, спасый человека: Препетый отцев Господь и Бог благословен еси.

Припев: Слава Господи Кресту Твоему честному и Воскресению.

Силою Твоею рог наш возвыси служащих Ти, воскресый из мертвых, и адово истощивый прежде многочеловечное богатство, Владыко: Препетый отцев Господь и Бог благословен еси.

Припев: Благословим Отца и Сына и святого Духа Господа.

Троицен: Речением Божественным последующе, славим Едино Божество, яко в Трех Светех Неслиянно, Непресекомо, пламень вечный просвещающий всю тварь, зовущую: Боже благословен еси.

Ин, Богородице :

Ирмос: Юношы три в Вавилоне:

Припев: Пресвятая Богородице спаси нас.

Привлечит мя к пению любовь девственная, огонь, иже в сердца, вопити Матери и Деве: Благословенная, Господь силам с Тобою.

Припев: Пресвятая Богородице спаси нас.

Превышши твари явилася еси, яко Творца рождши и Господа. Темже Ти вопию Богородице: Благословенная, Господь силам с Тобою.

Припев: Благословим Отца и Сына и святого Духа Господа.

Троицен: Господство Тя Едино чтый, в Трех Священних Нераздельно, воспеваю Триипостасное Естество, Благословенная, взывая Тебе, Яже вся управляющая.

Песнь 8

Ирмос: Руце распростер Даниил, / львов зияния в рове затче: / огненную же силу угасиша, / добродетелию препоясавшися, / благочестия рачители отроцы, взывающе: / благословите вся дела Господня Господа.

Припев: Слава Господи Святому Воскресению Твоему.

Руце распростер на Кресте, языки вся собрал еси, и едину явил еси Владыко Церковь воспевающую Тя, земную и небесную, согласно поющим: благословите вся дела Господня Господа, пойте и превозносите Его во веки.

Припев: Слава Господи Святому Воскресению Твоему.

Белообразен явился женам, неприступным светом воскресения блистайся ангел, что Живаго во гробе, вопия, ищите яко мертвца; воистинну воста Христос, Емуже вопием: вся дела пойте Господа, и превозносите во вся веки.

Припев: Пресвятая Богородице спаси нас.

Богородичен: Ты Едина во всех родех Дево Пречистая, Мати явилася еси Божия: Ты Божества была еси жилище Всенепорочная, не опальшися огнем Неприступнаго Света. Темже вси Тя благословим, Марие Богоневесто.

Ин, Кресту :

Ирмос: Отроки благочестивыя в пещи:

Припев: Слава Господи Кресту Твоему честному и Воскресению.

Неправедное видящи заклание Твое тварь, омрачающися рыдаше: земли бо смущающейся, во мрак яко в ризу черну солнце облечися: мы же Тя непрестанно поем, и превозносим Христе во веки.

Припев: Слава Господи Кресту Твоему честному и Воскресению.

Сшедый ко мне даже до ада, и всем путесотворивый воскресение, паки возшел еси, взял мя на раму Твоею, и Отцу привел еси. Темже зову Ти: Господа пойте дела, и превозносите во вся веки.

Припев: Благословим Отца и Сына и святого Духа Господа.

Троицен: Ума Перваго и виновнаго всех, Отца Единого Безвиновнаго славим, Слова же Безначальнаго, и Духа Утешителя, Единого Бога всех, Троице срасленной поклоняющися, и превозносяще во вся веки.

Ин, Богородице :

Ирмос: Избавителю всех Всесильне:

Припев: Пресвятая Богородице спаси нас.

От ребра Адамова создавый Тя, от Твоего девства воплотися, Иже всех Господь, Егоже поюще, вопием: вся дела благословите, пойте Господа, и превозносите Его во веки.

Припев: Пресвятая Богородице спаси нас.

В сени Авраам узре, еже в Тебе Богородице, таинство, Сына бо Твоего Безплотнаго прият, поя: вся дела благословите, пойте Господа, и превозносите Его во веки.

Припев: Пресвятая Богородице спаси нас.

Равночисленные Троицы спасло есть Твоего Девства проображение: в девственных бо телесех попираху пламень Отроковице, вопиюще: благословите, пойте Господа, и превозносите Его во веки.

Песнь 9

Ирмос: Камень нерукосечный, / от несекомыя горы Тебе Дево / краугольный отсечеса, / Христос, совокупивый разстоящаяся естества. / Тем веселящися Тя Богородице величаем.

Припев: Слава Господи Святому Воскресению Твоему.

Всего мя восприял еси весь в совокуплении неслитно, всему ми дая Боже мой, спасение страстию Твоею, юже на Кресте претерпел еси телесне, благоутробия ради многого.

Припев: Слава Господи Святому Воскресению Твоему.

Твои ученицы зряще отвержен гроб Твой, и богоносныя плащаницы испражнены воскресением Твоим, с ангелом глаголаху: воистинну воста Господь.

Припев: Благословим Отца и Сына и святого Духа Господа.

Троичен: Единиче убо Божественнаго Существа, но Ипостасьми Троице, вси вернии поклоняющися, в неслиянных Ипостасех Равносильную Единичестную ныне благочтуще величаем.

Ин, Кресту :

Ирмос: Всяк земнородный:

Припев: Слава Господи Кресту Твоему честному и Воскресению.

Льстивно пополз змий, из Едема поят мя пленена: на краниевем же твердем камени разби сего Вседержитель Господь, якоже младенца: и сладости паки мне вход древом крестным отверзе.

Припев: Слава Господи Кресту Твоему честному и Воскресению.

Положил еси крепкия вражия твердыни ныне в запустение: всеильнейшею же рукою богатство его расхитил еси из истощаний адовых совоскресивый мя Христе, и древле безмерно хвалящагося яко смех ругаема явил еси.

Припев: Слава Господи Кресту Твоему честному и Воскресению.

Прииди, нищих людей Твоих озлобление посещая, милостивною же и державною Твоею рукою укрепи крестоносныя люди, Твое изрядное достояние, Христе, яко Человеколюбец.

Ин, Богородице :

Ирмос: Сокровенное Божие неизреченное в Тебе:

Припев: Пресвятая Богородице спаси нас.

Зрим яко крин Тя ризою обагреною украшену, Пречистая, Божественнаго Духа, посреде терния сияющу, и благоухания исполняющу, иже Тебе искренно величающих.

Припев: Пресвятая Богородице спаси нас.

Тленное приим человеческое естество из Твоего, Всенепорочная, чрева Нетленный, в Себе показа нетленно, за благоутробие: темже Тя яко Богородицу величаем.

Припев: Пресвятая Богородице спаси нас.

Яже всеми владычествующи тварьми, людем Твоим даруй победное одоление, врага полагающи примирительна церкви: да Тя яко Богородицу величаем.

По катавасии ектения, и Свят Господь Бог наш: Посем светилен. Слава, и ныне, Богородичен.

На хвалитех стихиры воскресны, глас 4:

Стих: Сотворити в них суд написан: слава сия будет всем преподобным Его.

Крест претерпевый и смерть, / и воскресый из мертвых / Всесильне Господи, / славим Твое Воскресение.

Стих: Хвалите Бога во святых Его, хвалите Его в утверждении силы Его.

Крестом Твоим Христе, / от древняя клятвы свободил еси нас, / и смертью Твоею естество наше мучащаго диавола упразднил еси: / востанием же Твоим радости вся исполнил еси. / Темже вопием Ти: / воскресый из мертвых / Господи слава Тебе.

Стих: Хвалите Его на силах Его, хвалите Его по множеству величества Его.

Твоим Крестом Христе Спасе, / настави нас на истину Твою, / и избави нас от сетей вражиих, / воскресый из мертвых, / возстави ны падшыяся грехом, / простер руку Твою Человеколюбче Господи, / молитвами святых Твоих.

Стих: Хвалите Его во гласе трубнем: хвалите Его во псалтири и гуслех.

Отеческих Твоих недр не разлучився, / Единородный Слове Божий, / пришел еси на землю за человеколюбие, / Человек быв непреложен, / и крест и смерть претерпел еси плотию, / безстрастный Божеством: воскрес же из мертвых, / безсмертие подал еси роду человеческому, / яко Един Всесилен.

Ины стихиры Анатолиевы, глас тойже.

Стих: Хвалите Его в тимпане и лице, хвалите Его во струнах и органе.

Смерть приял еси плотию, / нам безсмертие ходатайствуя Спасе, / и во гроб вселился еси, / да нас от ада свободиши, воскресив с Собою: / пострада убо яко человек, / но воскрес яко Бог. / Сего ради вопием: / слава Тебе Жизнодавче Господи, / Едине Человеколюбче.

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Камение распадашеся Спасе, / егда на лобнем Крест Твой водрузися, / устрашишася адовы вратницы, / егда во гробе яко мертв положен был еси: / ибо смертную упразднил крепость, / умершым всем нетление подал еси / воскресением Твоим Спасе, / Жизнодавче Господи, слава Тебе.

Стих: Воскресни Господи Боже мой, да вознесется рука Твоя, не забуди убогих Твоих до конца.

Возжелеша жены видети / Твое воскресение, Христе Боже, / прииде предварши Мариа Магдалина, / обрете камень отвален от гроба, / и ангела

сидяща, и глаголюща: / что ищите живаго с мертвыми: / воскресе яко Бог, / да спасет всяческая.

Стих: Исповемся Тебе Господи всем сердцем моим, повем вся чудеса Твоя.

Где есть Иисус, Егоже вменисте стрещи, / рцыте иудеи; / где есть, Егоже положили во гробе, / камень запечатлевше; / дадите мертвыя, иже живота отвергнувшии: / дадите погребеннаго, / или веруйте воскресшему. / Аще и вы умолчите Господне востание, / камень возопиет, / паче же отваленный от гроба. / Великая Твоя милость, / велие таинство смотрения Твоего Спасе наш, / слава Тебе.

**Слава, стихира утренняя евангельская. И ныне, Богородичен:
Проблагословенна еси: Славословие великое.**

По славословии тропарь воскресен:

Воскрес из гроба, и узы растерзал еси ада, разрушил еси осуждение смерти Господи, вся от сетей врага избавивый, явивый же Себе апостолом Твоим, послал еси я на проповедь, и теми мир Твой подал еси вселенней, едине Многомилостиве.

Таже ектении, и отпуст. Посем час первый, и прочее обычное, и конечный отпуст.

На литургии блаженна, глас 4:

Древом Адам рая бысть изселен: древом же крестным разбойник в рай вселися. Ов убо вкуш, заповедь отверже Сотворшаго: ов же сраспинаемь, Бога исповеда Таящагося, помяни мя, вопия, во Царствии Твоем.

Стих: Блажени чистии сердцем, яко тии Бога узрят.

Вознесыйся на Крест, смертную разрушивый силу, и загладивый яко Бог еже на ны рукописание Господи, разбойниче покаяние и нам подаждь Едине Человеколюбче, верую служащим, Христе Боже наш, и вопиющим Ти: помяни и нас во Царствии Твоем.

Стих: Блажени миротворцы, яко тии сынове Божии нарекутся.

Рукописание наше на Кресте копием раздрал еси, и вменився в мертвых, тамошняго мучителя связал еси, избавивый всех от уз адовых воскресением Твоим, имже просветихомся Человеколюбче Господи, и вопием Ти: помяни и нас во Царствии Твоем.

Стих: Блажени изгнани правды ради, яко тех есть Царство Небесное.

Распныйся и воскресый яко Силен из гроба тридневен, и перевозданнаго Адама воскресивый Едине Безсмертне: и мене на покаяние обратитися Господи, сподоби от всего сердца моего, и теплою верою присно взывати Ти: помяни мя Спасе во Царствии Твоем.

Стих: Блажени есте, егда поносят вам, и ижденут, и рекут всяк зол глагол на вы лжуще Мене ради.

Нас ради Иже безстрастен страстный бысть человек, и волею на Кресте пригвождейся, нас совоскреси, темже и славим со Крестом страсть и воскресение, имиже возсоздахомся, имиже и спасаемся, взывающе: помяни и нас во Царствии Твоем.

Стих: Радуйтесь и веселитесь, яко мзда ваша многа на небесех.

Воскресшаго из мертвых, и адову державу пленившаго, и видима женами муриносицами, радуйтесь, глаголющаго, вернии умолим, от истления избавити души наша, зовуще всегда разбойника благоразумнаго гласом к Нему: помяни и нас во Царствии Твоем.

Слава, Троицен: Отца, и Сына, и Святаго Духа, вси единомудренно вернии славословити достойно помолимся: Единство Божества, в Трех сущее Ипостасех, неслиянно пребывающее, Просто, Нераздельно и Неприступно, Имже избавляемся огненнаго мучения.

И ныне, Богородичен: Мать Твою Христе, плотию без семене рождшую Тя, и Деву воистинну, и по Рождестве пребывшу Нетленну, Сию Ти приводим в молитву, Владыко Многомилостиве, прегрешений прощение даруй, всегда вопиющим Ти: помяни и нас во Царствии Твоем.

Прокимен, глас 4:

Прокимен: Яко возвеличишася дела Твоя Господи, * вся премудростию сотворил еси.

Стих: Благослови душе моя Господа, Господи Боже мой, возвеличился еси зело.

Аллилуиа: Наляцы, и успевай, и царствуй истины ради, и кротости, и правды.

Стих: Возлюбил еси правду, и возненавидел еси беззаконие.